



Raps, stipendis ed ina bancnota da milli

DA BERNARD CATHOMAS

■ **Da raps discurrivan nus sco uffant surtut da «Daniev»/Bumaun, cur ch'ins gieva per las chasas a giavischar in bun onn e survegniva in da tschintg, in da diesch u in da ventg, da rar in da tschuncanta. In pèr famiglias devan ils raps al scolast che repartiva quels il davos di da scola avant Son Silvester.**

Ellas pajavan per avair ruas da la buobanaglia l'emprim di da l'onn. Uschiglio eran raps strusch in tema. Quai che nus gudagnavan sco famegls, chavrers, nursers e pasturs dad alp u cun far laina per la tatta devan nus giu als geniturs. Nus savevan quant stgars ch'els avevan, er sch'els na laschavan mai sentir quai. Mintgatant schluppavi tuttina or.

Per exempel sche nus laschavan scriver si en stizun fin che l'administratur scheva in di: «Uss oisi lu scret si avunda». U sch'il bab gieva l'atun tar ils purs ad incassar per sias lavurs da roder: chars e schlieusas, berts e benas, e survegniva mo ina part dal dabun perquai che las entradas per las gianitschas vendidas eran stadas bassas. E cur che las rodas da gomma ed ils chars annexs da fier han remplazzà

las rodas ed ils chars da lain dal roder ed il bab steva qua senza gudogn ha el chattà lavur pajada endretg a Zervreila e pli tard sin ils implants da las ovras electricas a Breil e Tavanasa – e latiers per l'emprima giada in supplement per uffants e famiglia. Sco pitschen mastergnant sur savez n'aveva el avant nagin dretg sin talas prestaziuns socialas.

Uschia che la mamma fascheva – dasper sia truscha en chasa, uigl e sin il funs – anc da cusunza per gudagnar in pèr raps – e nus buobs stuevan empruvar en rassas per nossas cusrinas. Ina vargugna per in buob ch'ins acceptava mo sin cumond – e ch'era nunpajabla.

Cur ch'in trochist aveva ditg al bab ch'aveva gist pers: «Persuenter survegnan tes fegl stipendis» aveva lez respundi: «Jeu survegn stipendis per mes fegl, ti per toias envernontas, boin bien aschoia, ni buc?» ed era levà si ed ì.

Gia blers onns avant aveva il fegl da la cuvitga mussà a mai sco chavrer da Capeder/Gliz ina da milli – in pèr dis suenter la fier da Glion. La suletta bancnota da milli ch'jau hai vis en mia vita.

L'autur è pensiunà activ